

大方廣佛華嚴經卷第四

湯四

東晉天竺三藏佛陀跋陀羅等譯

盧舍那佛品第二之二

爾時普賢菩薩欲分別開示故告一切衆言
 諸佛子當知此蓮華藏世界海是盧舍那佛
 本修菩薩行時於阿僧祇世界微塵數劫之
 所嚴淨於一一劫恭敬供養世界微塵等如
 來一一佛所淨修世界海微塵數願行佛子
 當知有須彌山微塵等風輪持此蓮華藏莊
 嚴世界海最下風輪名曰平等彼持一切寶
 光明地次上風輪名種種寶莊嚴持清淨光
 寶地次上風輪名功德勢持密寶地次上風
 輪名曰寶炎持日不壞寶地次上風輪名普
 莊嚴持具足寶光明地次上風輪名離垢清
 淨平等持寶華炎地次上風輪名曰方行持

一切真珠地次上風輪名一切年持一切時
 一日半月一月一年次上風輪名普持勢持
 一切須彌山地次上風輪名莊嚴光明能持
 一切有如是次上有須彌山微塵等風輪最
 上風輪名勝藏持一切香水海彼香水海中
 有大蓮華名香幢光明莊嚴持此蓮華藏莊
 嚴世界海此世界海邊有金剛圍山周匝圍
 遶爾時普賢菩薩以偈頌曰
 於此蓮華藏 莊嚴世界海 一切妙寶藏
 種種淨光明 一切微塵等 過去佛所住
 昔於諸有海 離垢悉清淨 無量大悲雲
 充滿諸衆生 捨離自己身 如佛剎塵數
 於無量行海 常修令清淨 是故蓮華藏
 世界海莊嚴 一切虛空界 光明遍充滿
 安住不可動 勝風輪常持 一切寶莊嚴

妙風常流行	盧舍那曠願	令國土嚴淨
如意寶遍布	種種妙華敷	以本願力故
處在於虛空	堅固善安住	一切寶莊嚴
十方一切界	放清淨光雲	諸摩尼寶中
無量菩薩雲	遍遊十方國	光明極熾盛
寶華盛妙色	莊嚴光明輪	充滿諸法界
十方靡不遍	一切衆淨寶	悉放光明雲
十方諸世界	一切皆充滿	滅除一切苦
安立無上道	妙色悉普照	一切世界海
於此蓮華藏	世界海之內	一一微塵中
見一切法界	一切諸佛雲	放寶光明照
是盧舍那刹	有無量自在	一切衆生等
蓮華中諸佛	興種種無量	自在變化雲
釋梵諸天衆	及轉輪聖王	一切衆生類
皆悉得安住	變化放光明	悉與法界等

一切光明中 出諸佛妙音 知諸衆生心
 所念無有餘 無數方便門 調伏群生類
 離一切顛倒 常住於寂靜 無量光明雲
 悉與法界等 普賢所行智 無上勝妙地
 於光莊嚴中 皆悉具足聞

佛子當知此蓮華藏世界海金剛圍山依蓮
 華日寶王地住彼有一切香水海一切衆寶
 遍布其地金剛厚地不可破壞出生一切衆
 寶又能明照一切世界爾時普賢菩薩以偈
 頌曰

一切世界海	有無量莊嚴	寶輪無邊色
如來神力起	莊嚴斫迦羅	寶輪及香輪
依住真珠輪	及依種種寶	堅固寶莊嚴
閻浮檀淨藏	香光滿十方	照現斫迦羅
持以堅固金剛寶	金剛莊嚴不可壞	

種種衆寶相莊嚴	一身莊嚴清淨法
香水普流無量色	散華摩尼栴檀香
天衣遍覆華莊嚴	衆寶香草熏無量
清淨寶樹雲莊嚴	普能照明一切身
光明妙雲悉具足	樹下安坐靡不照
種種華香及幡蓋	一切菩薩充法界
能說一切語言海	是盧舍那轉法輪
彼處悉有珍寶幢	一切寶樹出光明
盧舍那佛身清淨	彼莊嚴內一切見
諸莊嚴中無數身	如來變化色無量
充滿一切十方界	調伏衆生無限量
一切莊嚴出妙聲	盧舍那佛所願輪
隨其清淨佛刹海	佛自在力皆悉聞

彼大斫迦羅山內世界海中有不可破壞摩尼寶王映現一切衆生之身衆寶蓮華以爲

莊嚴大地一切莊嚴妙雲皆悉充滿一切妙香而以熏之以三世佛刹莊嚴而莊嚴之爾時普賢菩薩以偈頌曰

其地平正淨圓滿	斫迦羅內不可壞
平等安住甚清淨	種種雜寶而莊嚴
金剛寶地可悅樂	寶輪羅網彌覆上
種種寶華爲莊嚴	雜種寶衣珍妙輪
隨次遍布一切地	菩薩天冠寶瓔珞
離垢莊嚴光明照	妙香碎寶悉充滿
光明衆寶花莊嚴	普放一切滿十方
寶華遍覆一切地	悉能長養佛功德
興一切雲滿虛空	光明普照不可盡
光明悉滿一切刹	具說佛法甘露味
悉入一切佛所願	常能廣見三世法
隨順菩薩大士行	於此大地皆悉見

此清淨地寶莊嚴 一切佛刹悉來入

其地一一微塵中 一切佛刹亦悉入

衆寶妙華莊嚴藏 十方菩薩常往來

常聞菩薩一切願 及諸菩薩自在德

有寶光明相莊嚴 離垢嚴淨出光明

示現一切諸佛法 充滿法界如虛空

有得普賢所願者 諸佛境界無量智

彼得無量勝自在 能入無邊佛刹海

彼大地處有不可說佛刹微塵等香水海衆

寶莊嚴一切香摩尼寶王以爲其岸寶王羅

網彌覆其上衆寶色水盈滿其中一切衆華

皆悉開敷細末栴檀以香其水常出如來妙

音不絕衆香次第普熏十方雜寶階道眞珠

欄楯衆寶潮浪出妙音聲恒沙佛刹微塵數

等寶華樓閣周匝圍遶無量佛刹微塵等衆

寶華城以周其外十大千世界微塵數華一

一蓮華各十由旬開敷鮮茂遍布水上其香

普熏一切世界十佛國土微塵數香樹以爲

莊嚴爾時普賢菩薩以偈頌曰

於彼嚴淨大地處 香水寶海而莊嚴

清淨寶地常安住 金剛堅固不可壞

衆香寶王以爲岸 寶雲光明如日照

眞珠寶華妙瓔珞 離垢清淨普莊嚴

清淨香水湛然滿 衆寶華光爲旋流

妙聲悅樂常不斷 自在普聞佛世界

衆珍校飾淨階道 寶莊嚴地安不動

眞珠妙寶爲欄楯 光明寶華可悅樂

寶樹羅生緣道側 摩尼寶樂煥明曜

演出無量和雅聲 莊嚴淨音歎三寶

香水柔輒湛然滿 分陀利華遍圍遶

一切香華出光明 清淨具足而莊嚴
於寶幢中有光明 垂寶旗幡而莊嚴
摩尼寶網出妙聲 聞者能入一切智
衆寶華城甚微妙 無量寶色淨光明
十方世界靡不照 一切具足光嚴飾

垣墻周帀而圍遶 種種雜寶爲莊嚴
清淨寶炎相任持 具足莊嚴寶香海
盧舍那佛過去行 令佛刹海甚清淨
無數無量無邊際 彼處一切自在轉
一一香水海有四天下微塵數香水河圍遶

種種寶華彌覆其上彼諸香水河從佛眉間
白毫相出摩尼寶王汎上隨流爾時普賢菩
薩以偈頌曰

離垢清淨香水流 金剛寶華悉彌覆
衆寶輪地布金沙 無量珍琦普莊嚴

淨妙階道七寶成 諸欄楯上植蓮華
眞珠寶華常敷榮 懸雜華鬘爲莊嚴
一切寶光微妙色 清淨香水雜寶流
種種華寶爲波浪 衆音諧雅演佛聲
栴檀寶末和清流 無量雜寶爲洄復

普出種種香光炎 常流一切十方界
一切香河出無量 雜種妙勝諸珍寶
衆寶積集爲華蓋 光明普照香水河
十方無量世界中 佛光明照見寶王
如來道場寶輪地 衆寶香河盈流滿
諸寶羅網相扣摩 演佛音聲常不絕
一切菩薩諸佛法 普賢大士所修行
諸佛世尊願音聲 於彼寶岸常得聞
一切如來過去行 皆悉遍聞十方國
一切香河諸旋流 一切菩薩功德雲

漸漸盈滿諸法界 見一切刹無不至

彼諸一切香水河 淨寶王雲彌覆上

佛白毫相出寶王 其光明曜等如來

彼香河中一切平正諸妙寶樹以為莊嚴

雜種寶幔彌覆其上佛四一切菩薩願力所起佛

所護念三世莊嚴而莊嚴之爾時普賢菩薩

以偈頌曰

盧舍那佛遍十方 出一切化莊嚴身

彼亦不來亦不去 佛願力故皆悉見

一切佛刹微塵中 無量佛子修諸行

悉受清淨國土記 見嚴淨刹稱本行

佛子當知此蓮華藏世界海中一一境界有

世界海微塵數清淨莊嚴諸佛子此香水海

上有不可說佛刹微塵數世界性住或有世

界性蓮華上住或在無量色蓮華上住或依

真珠寶住或依諸寶網住或依種種衆生身

住或依佛摩尼寶王住或須彌山形或河形

或轉形或旋流形或輪形或樹形或樓觀形

或雲形或網形爾時普賢菩薩以偈頌曰

堅固清淨諸佛刹 離垢解脫光明藏

依止摩尼寶海住 或有依止香海住

或依種種方便住 或依莊嚴衆色住

或復須彌樹圓形 種種方形佛刹住

或光明身諸華藏 寶雲普放淨光明

光明充滿勝世界 寶地海藏不可壞

或淨佛刹無量色 光明炎雲衆色等

或有妙音諸世界 自然常音不思議

無數願樂種種身 自在行雲音聲身

衆生無量德音身 最勝一切德音身

種種門入諸佛刹 漸至無盡不思議

無數一切滿十方 無盡無量普自在
 一切諸方如來刹 廣大方便入佛界
 見十方刹漸次至 國土不增亦不減
 以一國土滿十方 十方入一亦無餘
 世界本相亦不壞 無比功德故能爾
 一切佛刹微塵中 湯四 見盧舍那自在力
 弘誓願海振音聲 調伏一切衆生類
 佛身充滿一切刹 無數菩薩亦如是
 教化衆生無有量 佛現自在無倫匹
 爾時普賢菩薩告諸菩薩言佛子彼衆香水
 海中有一香水海名樂光明有一切香摩尼
 寶王莊嚴蓮華上有世界名清淨寶網光明
 佛號離垢淨眼廣入彼世界上過佛刹塵數
 世界有佛國名離香蓮華勝妙莊嚴依寶網
 住形如師子座佛號師子座光明勝照彼世

界上過佛刹塵數世界有佛國名寶莊嚴普
 光明依諸華住形如日輪雲佛號廣大光明
 智勝彼世界上過佛刹塵數世界有佛國名
 雜光蓮華佛號金剛光明普精進善起彼世
 界上過佛刹塵數世界有佛國名無畏嚴淨
 佛號平等莊嚴妙音幢王彼世界上過佛刹
 塵數世界有佛國名華開淨炎佛號愛海功
 德稱王彼世界上過佛刹塵數世界有佛國
 名總持佛號淨智慧海彼世界上過佛刹塵
 數世界有佛國名解脫聲佛號善相幢彼世
 界上過佛刹塵數世界有佛國名勝起佛號
 蓮華藏光彼世界上過佛刹塵數世界有佛
 國名善住金剛不可破壞佛號那羅延不可
 破壞彼世界上過佛刹塵數世界有佛國名
 華林赤蓮華佛號雜寶華鬘智王彼世界上

過佛刹塵數世界有佛國名淨光勝電如來
 藏佛號能起一切所願功德彼世界上有香
 水海名淨光炎起中有世界性名善住次上
 復有香水海名金剛眼光明中有世界性名
 法界等起次上復有香水海名蓮華平正中
 有世界性名出十方化身次上復有香水海
 名寶地莊嚴光明中有世界性名寶枝莊嚴
 次上復有香水海名化香炎中有世界性名
 清淨化次上復有香水海名寶幢中有世界
 性名佛護念次上復有世界性名衆色普光
 如是次上有世界塵數香水海及世界性如
 一方十方亦如是盧舍那佛常轉法輪處爾
 時普賢菩薩以偈頌曰
 法界不可壞 蓮華世界海 離垢廣莊嚴
 安住於虛空 此世界海中 刹性難思議

善住不雜亂	各各悉自在	平正住莊嚴
依種種色住	如來世界海	佛刹相隨順
種種身音聲	一切佛自在	普見諸世界
種種業莊嚴	須彌山城網	水旋輪圓形
清淨色蓮華	彼彼悉圍遶	尸羅幢瓮形
隨順轉色形	如是難思議	諸佛國土形
不思議世界	依止蓮華住	於大光明網
普照於一切	一一如來刹	放諸光明網
照一切佛國	充滿十方海	一切諸佛刹
一切境界門	一切方便入	皆悉見無量
不思議佛刹	不壞不可盡	無量淨莊嚴
大仙威神力	彼如來刹頂	不思議世界
或成或有敗	不生亦不滅	譬如諸樹林
華葉或生落	如是諸佛刹	成敗亦復然
如依種種樹	有種種果生	如是種種刹

有種種衆生	種子差別故	果實生不同
行業若干故	佛刹種種異	譬如寶珠
隨意現衆色	除諸妄想故	悉見清淨刹
譬如空中雲	龍王力能現	如是佛願力
一切佛刹起	猶如工幻師	能現種種業
如是衆生業	佛刹不思議	如見彩畫像
知是畫師造	如是見佛刹	心畫師所成
衆生心不同	隨起諸妄想	如是諸佛刹
一切皆如化	猶如見導師	種種無量色
隨衆生心行	見佛刹亦然	無量眞珠華
悉覆諸佛刹	色殊各不同	離垢莊嚴現
彼蓮華網中	佛刹網依住	種種妙莊嚴
衆生所依處	或有佛刹地	垢穢不平正
衆生煩惱故	起如是佛刹	清淨不清淨
佛刹不思議	衆生希望起	菩薩之所持

清淨不清淨	無量諸佛刹	業海因緣起
菩薩之所化	或放清淨光	離垢衆寶體
種種妙莊嚴	諸佛令清淨	一佛國土中
火災不可議	示現不清淨	而刹常堅固
或依風輪住	或復依水輪	無量刹成敗
衆生行業故	見無量佛刹	或成或有敗
彼亦無有成	亦復無有敗	於一一念中
無量佛刹起	諸佛所持故	國清淨離垢
或有佛刹起	泥土不清淨	離明常闇冥
罪衆生所住	或有泥土刹	煩惱大恐怖
樂少憂苦多	薄福之所處	或有鐵世界
或有赤銅國	諸石山穢惡	衆生業故起
或有泥土刹	衆生常苦惱	長冥離光明
光明海能照	諸畜生趣中	受無量種身
隨宿行業故	長受無量苦	閻羅王界中

飢渴苦常逼	登上大火山	長受無量苦
或有七寶刹	平正住莊嚴	清淨業力起
微妙善安隱	彼佛刹土中	唯有人天趣
功德果成就	常受諸快樂	一一毛孔中
不思議億刹	無量形莊嚴	種種業所起
隨其自業起	衆生界難議	取種種相已
或受樂受苦	或刹光無量	一切寶為地
金剛華遍覆	離垢淨莊嚴	或刹光明體
光明輪安住	金色栴檀香	光明雲常照
或刹日輪體	布衆香寶衣	或一蓮華中
菩薩悉充滿	或有無量色	離垢寶佛刹
紺寶光明網	光明網電照	或有佛刹土
金剛華為體	或布衆寶華	觀察甚清淨
普賢菩薩願	所得清淨國	三世莊嚴刹
悉現於此中	諸佛子女觀	佛世界自在

未來一切刹	悉現皆如夢	十方一切刹
過去佛國海	於一世界見	一切刹如化
三世一切佛	并一切佛土	於一世界見
三世佛及刹	觀微塵上刹	一切佛自在
無量妙莊嚴	皆悉如電光	或無量佛土
其形猶如海	有如須彌山	世界難思議
有國如珠貫	依紺寶網住	或依樹莊嚴
一切佛充滿	或依摩尼輪	或依止蓮華
八埵雜莊嚴	離垢種種色	或如師子座
或有國如金	或如衆寶形	或如梵世處
或天主月形	又復形如日	或如摩尼寶
栴檀香莊嚴	或如旋香鬘	佛世界安住
或如光明輪	種種色莊嚴	或壽命一劫
或復壽百劫	或復有壽命	佛刹微塵等
或於一劫中	見無量刹起	無量不可數

不思議刹壤	或國土無佛	或國土有佛
或國土一佛	或有無量佛	若國土無佛
他方異世界	有諸化佛來	示現自在教
從兜率捨壽	降神處胎生	降魔成正覺
轉無上法輪	隨衆生所樂	種種色示現
一切時不壞	轉清淨法輪	若衆生非器
非佛令不見	煩惱所障礙	不見如來意
或刹極濁惡	常聞弊惡音	剛強羸獷聲
不愛大恐怖	彼地獄畜生	餓鬼趣受苦
是濁惡佛刹	衆生憂惱海	或刹甘露音
常聞柔輦聲	清淨業道音	普聞一切刹
或有佛刹聞	釋提桓因聲	梵天王妙聲
諸世界主聲	光明旋音聲	佛化身無盡
諸菩薩音聲	常聞佛刹海	或不思議刹
聞轉法輪聲	不可盡願聲	所修行音聲

湯四

十三

聞三世諸佛 具足尊名號 隨緣起佛刹
音聲不可盡

諸佛子乃往久遠過世界海微塵數劫復過
是數爾時有世界海名淨光普眼中有世界
性名勝妙音依止摩尼華網海住清淨無穢
有須彌山塵數世界以為眷屬無量寶莊嚴
地有三百重衆寶圍山高廣嚴淨周匝圍遶
其世界性形如須彌山天宮莊嚴以念為食
彼世界性中有香水海名清淨光彼香海中
有須彌山名大炎華莊嚴幢以十種寶欄楯
圍遶彼須彌山有林觀名寶華枝以無量華
樓閣無量寶幢樓閣無量紺寶網種種色華
而莊嚴之無量香雲彌覆其上十億百千城
周匝圍遶於彼林東有一天城名曰炎光純
香所成面千由旬七寶為郭周匝圍遶其城

樓觀雜寶莊嚴覆以雜華及諸寶網微風吹動出妙音聲其城有門一萬二千建雜寶幢而莊嚴之十億園林周而圍遶城中衆生皆悉成就業報神足行同諸天一切所欲應念即至於彼林南有一大城名樹華莊嚴次有龍城名曰究竟次有夜叉城名金剛勝妙莊嚴幢次有乾闥婆城名離垢善次有阿脩羅城名寶輪地次有迦樓羅城名衆寶莊嚴善光次有緊那羅城名娛樂莊嚴次有摩睺羅伽城名寶金剛幢時彼林中有一道場名寶華莊嚴其道場前有大蓮華名華炎具足縱廣百億由旬十億蓮華眷屬圍遶時彼世界過百歲已有佛出世如是次第有十須彌山塵數如來出興于世其最初佛名一切功德本勝須彌山雲時佛處彼大蓮華上眉間白

毫放大光明名一切功德覺有十佛世界塵數光明以爲眷屬彼光滅除一切衆生煩惱蓋障令得淨心起功德海永離三惡八難諸趣發菩提心諸佛子時彼炎光城中有王名愛見善慧其王統領百億諸城有三萬七千夫人婁女二萬五千子其第一子名功德勝次名普莊嚴童子時彼童子見佛無量自在功德善根因緣故即得十種三昧名曰諸佛具足功德三昧普門方便三昧淨方便雲三昧教化衆生三昧一切音聲充滿三昧無量功德誠向三昧如實覺諸法三昧廣地方便海三昧勝解脫三昧一切智光三昧爾時普莊嚴童子以偈頌曰

猶如千日出 虛空靡不照 離垢坐道場
光明亦如是 無量萬億劫 難遇之導師

出興於世間	一切見最勝	觀察佛光明
如雲難思議	一切處悉見	如對現目前
毛孔放光明	如雲不可盡	隨諸衆生音
讚佛無量德	衆生遇佛光	離苦永寂滅
悉安隱快樂	歡喜遍充滿	觀察諸菩薩
充滿十方界	放摩尼寶雲	讚歎諸最勝
常於道場聞	深妙音聲海	滅諸衆生苦
觀佛自在力	一切興恭敬	歡喜心無量
往詣法王所	瞻仰禮供養	
時彼童子說偈音聲於彼世界無不普聞爾		
時愛見善慧王聞說是偈歡喜無量以偈頌		
曰		
宜時普宣告	諸王大臣等	令知吉祥相
咸速詣最勝	莊飾一切城	宜令悉清淨
建諸妙幢幡	種種寶莊嚴	設衆妙寶帳

彌覆羅其上	興伎樂音雲	令充遍虛空
掃除諸街巷	降以雜寶雨	莊嚴衆寶乘
當詣見最勝	各於其帳內	兩種種雲雨
一切莊嚴雲	流行虛空中	香蓮華光雲
華蓋難思議	瓔珞半月雲	雨衆妙寶衣
須彌山香水	摩尼寶莊嚴	清淨衆雜寶
顯現虛空中	摩尼寶華鬘	離垢衆寶鬘
摩尼寶燈雲	凝照停虛空	矚想皆念佛
生無量歡喜	妻子眷屬俱	當詣見最勝
爾時愛見善慧王與七十七億那由他眷屬		
俱往詣一切功德本勝須彌山雲佛所到已		
頭面禮足於一面坐有無量天龍夜叉乾闥		
婆阿脩羅迦樓羅緊那羅摩睺羅伽等往詣		
佛所頭面禮足於一面住爾時如來教化一		
切諸衆生故於彼衆海中說經名現三世一		

切諸佛集會世界塵數修多羅以為眷屬隨
 諸衆生所應解故爾時普莊嚴童子聞是經
 已宿世功德因緣故得一切法具足三昧一
 切法來入安住菩提心三昧法界師子光方
 便三昧法眼清淨三昧爾時童子以偈頌曰

我聞最勝法 清淨慧眼開 能見一切佛
 過去功德海 我見一切生 如本色具足
 隨本名身業 供養一切佛 過去諸佛所
 無量劫海行 我見諸佛海 清淨佛刹海
 於生死海中 捨自身無量 修菩薩勝行
 嚴淨佛刹海 捨無量耳鼻 頭目及手足
 王身大臣身 具足修淨國 一一佛刹中
 難思議億劫 修行菩薩道 令佛刹海淨
 普賢菩薩願 修習諸行海 一切刹海中
 令佛土清淨 如日光明淨 悉見色具足

佛智光照已 見我本修行 見無量諸佛
 離垢清淨刹 成等正覺聲 悉充滿法界
 如彼修清淨 具足佛刹海 一切佛神力
 應修菩薩行

說是偈時如須彌山塵數衆生悉發無上道
 心時彼如來為此童子而說頌曰

善哉普莊嚴 德藏大名稱 能為衆生故
 勇猛求菩提 能發智慧光 滿一切法界
 無上道德雲 當得智慧海 一國中修行
 一刹微塵劫 當逮是智慧 如我之所得
 懈怠者不能 解深方便海 精進力成就
 能淨佛世界 一切微塵數 劫海修衆行
 彼得淨如是 如我佛刹海 一一衆生故
 無量劫苦行 不厭生死難 能為大導師
 無量無邊願 一切諸佛海 能度無上道

方便海具足 恭敬供養我 普莊嚴大力
勝須彌山佛 成汝無上道 普賢常勇猛
具足大名稱 一切法界滿 淨諸佛刹海
爾時一切功德本勝須彌山雲如來壽五十
億歲彼佛滅度後有佛出世號一切度離癡

清淨眼王如來普莊嚴童子見是如來已即
得念佛三昧普門海藏三昧無量智持轉法
三昧甚深法樂三昧時佛說經名一切法界
自性離垢莊嚴有世界微塵等修多羅以為
眷屬普莊嚴童子聞是經已即得三昧名一
切法普門歡喜藏三昧入一切法方便海三
昧

如來名號品第三

佛在摩竭提國寂滅道場初始得佛普光法
堂坐蓮華藏師子座上善覺智無二念了達

法性住佛所住等諸如來至無礙趣具不退
法無壞境界住不思議等達三世與十佛國
土微塵數等大菩薩俱盡一生補處悉從他
方世界來集了衆生性深入法界常善思量
世間涅槃明了業報衆生心行悉能解知諸
法義味觀察世間離世間法究竟分別為無
為性去來現在靡不貫達時諸菩薩咸作是
念唯願世尊哀愍我等隨所志樂示現佛刹
示佛所住示佛國莊嚴示諸佛法示佛土清
淨示佛所說法示佛刹體示佛功德勢力示
隨佛刹起示成正覺開示十方一切如來所
可分別菩薩十住十行十迴向十藏十地十
願十定十自在十頂菩薩隨喜心不斷如來
性救衆生滅煩惱知衆行解諸法離垢穢拔
衆難決疑網竭愛欲佛無上地佛境界佛住

壽佛行佛力佛無所畏佛定佛神足佛勝佛
 不動轉佛六情根佛光佛智無上功德一切
 具足如是等事悉為我現爾時世尊知諸菩
 薩心之所念即如其像現神通力現神力已
 東方過十佛刹微塵數國有世界名金色佛
 號不動智有菩薩字文殊師利與十佛土塵
 數菩薩來詣佛所恭敬供養頭面禮足即於
 東方化作蓮華藏師子之座結跏趺坐南方
 過十佛刹微塵數國有世界名樂色佛號大
 智有菩薩字覺首與十佛土塵數菩薩來詣
 佛所恭敬供養頭面禮足即於南方化作蓮
 華藏師子之座結跏趺坐西方過十佛刹微
 塵數國有世界名華色佛號習智菩薩字財
 首與十佛土塵數菩薩來詣佛所恭敬供養
 頭面禮足即於西方化作蓮華藏師子之座

結跏趺坐北方過十佛刹微塵數國有世界
 名蒼蘆華色佛號行智菩薩字寶首與十佛
 土塵數菩薩來詣佛所恭敬供養頭面禮足
 即於北方化作蓮華藏師子之座結跏趺坐
 東北方過十佛刹微塵數國有世界名青蓮
 華色佛號明智菩薩字德首與十佛土塵數
 菩薩來詣佛所恭敬供養頭面禮足即於東
 北方化作蓮華藏師子之座結跏趺坐東南
 方過十佛刹微塵數國有世界名金色佛號
 究竟智菩薩字目首與十佛土塵數菩薩來
 詣佛所恭敬供養頭面禮足即於東南方化
 作蓮華藏師子之座結跏趺坐西南方過十
 佛刹微塵數國有世界名寶色佛號上智菩
 薩字進首與十佛土塵數菩薩來詣佛所恭
 敬供養頭面禮足即於西南方化作蓮華藏

師子之座結跏趺坐西北方過十佛刹微塵
數國有世界名金剛色佛號自在智菩薩字
法首與十佛土塵數菩薩來詣佛所恭敬供
養頭面禮足即於西北方化作蓮華藏師子
之座結跏趺坐下方過十佛刹微塵數國有
世界名玻瓈色佛號梵智菩薩字智首與十
佛土塵數菩薩來詣佛所恭敬供養頭面禮
足即於下方化作蓮華藏師子之座結跏趺
坐上方過十佛刹微塵數國有世界名如寶
色佛號伏怨智菩薩字賢首與十佛土塵數
菩薩來詣佛所恭敬供養頭面禮足即於上
方化作蓮華藏師子之座結跏趺坐是時文
殊師利菩薩承佛神力觀察大衆歎曰快哉
今菩薩會為未曾有諸佛子當知佛刹不可
思議佛住佛國佛法佛刹清淨佛說法佛出

湯四

二十

世佛刹起諸佛阿耨多羅三藐三菩提皆不
可思議何以故十方諸佛說法知彼心行隨
化衆生與虛空法界等何以故此娑婆世界
中諸四天下教化一切種種身種種名處所
形色長短壽命諸得諸入諸根生處業報如
是種種不同衆生所見亦異何以故諸佛子
此四天下佛號不同或稱悉達或稱滿月或
稱師子吼或稱釋迦牟尼或稱神仙或稱盧
舍那或稱瞿曇或稱大沙門或稱最勝或稱
能度如是等稱佛名號其數一萬諸佛子次
此東方有四天下名曰善護彼稱如來或號
金剛或號尊勝或號大智或號不壞或號雲
王或號無諍或號平等或號歡喜或號無比
或號默然如是等稱佛名號其數一萬諸佛
子次此南方有四天下名曰難養彼稱如來

湯四

二十一

或名甘露灌或名善名稱或名離垢或名實
論師或名調御或名樂慧或名大音或名衆
祐或名無量或名勝慧如是等稱佛名號其
數一萬諸佛子次此西方有四天下名曰佛
慧彼稱如來或謂性慧或謂愛現或謂無上
王或謂無恐怖或謂實慧或謂常化或謂知
足或謂法慧或謂究竟或謂能忍如是等稱
佛名號其數一萬諸佛子次此北方有四天
下名師子言彼稱如來或稱大牟尼或稱苦
行或稱婆伽婆或稱福田或稱一切智或稱
善意或稱清淨或稱伊那婆那或稱勝鬘或
稱願行滿如是等稱佛名號其數一萬諸佛
子次此東北方有四天下名曰安寧彼稱如
來或號法王或號等起或號寂靜或號妙天
或號離欲或號勝慧或號等心或號無壞或

號慧音或號遠來如是等稱佛名號其數一
萬諸佛子次此東南方有四天下名曰喜樂
彼稱如來或名蓮華或名慧火或名智人或
名密教或名解脫或名自然安住或名妙行
成就或名清淨眼王或名上勇或名精進力
如是等稱佛名號其數一萬諸佛子次此西
南方有四天下名曰堅固彼稱如來或稱不
動或稱慧王或稱滿慧或稱無動慧或稱常
悲或稱頂王或稱勝音或稱一切施或稱持
仙或稱勝須彌山如是等稱佛名號其數一
萬諸佛子次此西北方有四天下名須菩提
彼稱如來或號普慧或號光明成就或號寶
髻或號應敬念或號無上義或號悅樂或號
本性清淨或號光明滿或號脩臂或號本善
住如是等稱佛名號其數一萬諸佛子次此

下方有四天下名曰炎道彼謂如來或名長養善根或名師子色或名利智或名真金炎或名普現或名梵音或名饒益或名究竟來或名真天或名平等施如是等稱佛名號其數一萬諸佛子次此上方有四天下名曰持地彼謂如來或稱猛慧或稱無量清淨或稱覺慧或稱勇首或稱妙莊嚴或稱能發歡喜或稱意成滿或稱火光或稱精進或稱一乘諸佛子如是持地四天下稱佛名號其數一萬此娑婆世界有如是等百億四天下彼稱如來亦各不同有百億萬諸佛子此娑婆世界東次有國土名曰密訓彼謂如來或稱平等或稱最勇或稱安慰或稱調意或稱聞慧或稱一切捨或稱自在或稱堅固身或稱大超越或稱無比智諸佛子如是密訓國土稱

佛名號有百億萬諸佛子此世界南次有國土名曰最勇彼謂如來或稱自然清淨或稱意至到如是等稱佛名號有百億萬諸佛子此世界西次有國土名曰離垢彼謂如來或稱具足直心或稱分別道或稱善持或稱解脫衆亂或稱論師或稱分別衆寶或稱無上現或稱來化或稱一切苦行或稱具足力如是等稱佛名號有百億萬諸佛子此世界北次有國土名實境界彼謂如來或稱蘆蔔華色或稱日藏或稱依精進住或稱等起住壽或稱超實或稱慧日或稱無障礙或稱月出或稱慧火勢或稱清淨身如是等稱佛名號有百億萬諸佛子此世界東北次有國土名曰呵尼彼稱如來或號離苦或號一切解脫或號因緣具足或號解脫智慧或號過去藏

或號寶光或號離世間或號至離身地或號
端嚴藏或號離瞋恚心如是等稱佛名號有
百億萬諸佛子此世界東南次有國土名曰
饒益彼稱如來或號因緣或號盡智或號美
音或號相勝或號莊嚴蓋或號淨根或號殊
特或號分別到彼岸或號勝定或號慈父或
號智海如是等稱佛名號有百億萬諸佛子
此世界西南次有國土名曰甚少彼稱如來
或號牟尼主或號樂寶或號不二觀或號知
智或號謙意或號有緣見或號根主或號天
人師或號建業或號金剛華如是等稱佛名
號有百億萬諸佛子此世界西北次有國土
名曰知足彼稱如來或號華聚或號栴檀蓋
或號蓮華藏或號超越諸法或號法顯或號
次超或號善淨蓋或號離垢善根或號善言

或號專念法或號五法藏如是等稱佛名號
有百億萬諸佛子此世界下次有國土名離
搏食彼稱如來或號真珠炎或號普化或號
法命主或號無爲或號覺根或號離塵或號
風無礙或號欣施或號分別道或號建幢如
是等稱佛名號有百億萬諸佛子此世界上
次有國土名解脫音彼稱如來或號猛幢或
號無量寶或號樂大施或號天光或號吉祥
興或號離死地或號最勝或號不退輪或號
離非法或號修一切智諸佛子此解脫音世
界稱佛名號有百億萬如娑婆國土及十世
界如是東方百千億不可量不可數不可思
議不可稱無等無邊無分齊不可說虛空法
界等世界中衆生稱佛名號各各不同南西
北方四維上下亦復如是皆是如來爲菩薩

時有因緣者為度此故種種方便口業音聲
行業果報法門權道諸根所樂令諸衆生知
如來法

大方廣佛華嚴經卷第四

涉四

二十五

音釋

斫迦羅 梵語也亦云跋
此云金剛斫職
犢 古猛切
羸惡也
矚 欲切
甚也
羅汎 孚梵切
浮也
擗 度官切
度官
峴